

四庫全書

史部

欽定四庫全書

史部

江南通志卷一百四十二

詳校官給事中臣丁雲錦

檢討臣德生覆勘

總校官編修臣王燕緒

校對官助教臣卜維吉

贊錄監生臣魏繩曾

欽定四庫全書

江南通志卷一百四十一

人物志

宦績

三松江一府

松江府

後漢陸康字季寧吳郡吳人少仕郡以義烈稱刺史臧旻舉為茂才除高成令以恩信為治遷武陵太守轉桂陽樂安二郡所在稱之時靈帝欲鑄銅人

調民田畝斂十錢康上疏諫內倅譖之徵詣廷尉  
釋免歸復徵為議郎拜廬江太守平郡賊黃穠等  
獻帝時加忠義將軍

三國吳陸遜字伯言康從孫始仕孫權幕府出為海  
昌屯田都尉勸督農桑百姓蒙賴募兵平會稽鄱  
陽賊帥拜定威校尉權數訪世務納其議以為帳  
下右部督呂蒙薦其才堪負重拜偏將軍代蒙鎮  
陸口遂克公安南郡拜撫邊將軍封華亭侯進封

婁侯黃武元年劉備率大衆至夷陵立數十屯遜以火攻拔之破其四十餘營加輔國將軍領荊州牧改封江陵侯後又大敗魏大司馬曹休於皖赤烏七年代顧雍為丞相尋卒謚昭侯

陸抗字幼節遜子襲父爵拜奮威將軍歷遷鎮軍大將軍都督信陵西陵樂鄉諸軍事孫皓即位抗聞都下政令多闕憂深慮遠乃上疏陳時宜十七條鳳皇元年西陵督步闡據城叛遣使降晉羊祜

率師向江陵抗破其將楊肇遂拔西陵誅閻東還  
樂鄉貌無矜色拜大司馬荊州牧卒

陸瑁字子璋遜弟少好學篤義從父績蚤亡一男  
一女皆數歲瑁迎攝養至長乃別嘉禾元年徵拜  
議郎選曹尚書孫權忿公孫淵反覆欲親征之瑁  
上疏諫權再覽瑁書嘉其詞理端切遂不行子喜  
亦涉文籍好人倫孫皓時為選曹尚書

陸凱字敬風遜族子黃武初為永興諸暨長所在

有治跡除儋耳太守討朱崖斬獲有功遷建武校  
尉討山賊陳愍於零陵克捷封都鄉侯轉武昌右  
部督孫皓立進封嘉興侯遷左丞相時政事多謬  
凱上表疏皆指事不飾忠懇內發子禕為太子中  
庶子華穀表薦禕體質方剛器幹強固董率之才  
魯肅不遇云

晉陸士光以字稱瑁孫少有雅望元帝初鎮江左辟  
為祭酒以清貞著預討華軼功封平望亭侯明帝

時歷尚書左僕射為領軍將軍與王導卞壺等輔  
皇太子成帝踐阼拜光祿大夫蘇峻之難隨帝在  
石頭舉止方正不以兇威變節峻以士光吳士之  
望不敢加害峻平進爵為公卒謚曰穆弟玩字士  
瑤器量淹雅仕至司空玩子納字祖言清貞絕俗  
官歷尚書令

宋朱諤字聖與秀州華亭人舉進士第二徽宗時官  
御史中丞嘗奏願開內閣延羣臣從容論道如神

宗故事歷拜尚書右丞卒謚忠靖

柳約字元禮秀州華亭人大觀三年進士遷博士深於經術屬詞粹微大為學者師慕靖康初權殿中侍御史論三鎮不可棄高宗時以直龍圖閣知嚴州時金人大入列郡震恐約屹保孤城悉力捍禦境內安堵進集英殿修撰召入對再三獎勞擢權戶部侍郎約感激盡言凡例外宣索皆執奏不進會高麗請修貢議遣使報聘加試戶部侍郎充

其選且將大用當路忌之終敷文閣待制

衛膚敏字商彥華亭人宣和元年進士厯遷秘書  
省校書郎命假給事中使金往復爭辯殊不為屈  
建炎初拜右諫議大夫后父邢煥除待制太后兄  
子孟忠厚除學士膚敏言非祖宗法二人因改職  
又言揚州錢塘俱非帝王都宜亟遷金陵因陳守  
江之策帝善其言除刑部侍郎卒

錢良臣字友魏華亭人紹興進士厯官參知政事

德望端偉為時所重孝宗褒之曰如卿真可謂通世務之儒遂書通儒二字賜之出知鎮江卒謚文惠

許克昌字上達華亭人紹興末舉進士第一以有官改第二累官右正言時松江新涇塘為海潮衝突鹹水延及嘉湖二境克昌請於上移堰入運港以避潮勢由是三州之田免鹹潮之患

元費察字子壽自長興徙上海宋末以策干兩淮制

置使補武節郎提舉上海市舶元初遷管軍總管  
鎮守上海沿海民船無所統或流為盜賊察請錄  
編戶而官領之得海船數千稍木數萬備國用卒  
謚榮敏

任仁發字子明華亭人年十八中鄉試元兵南下  
大帥見而器之委招安海島遷貳都水監府境開  
江置舖皆仁發主其議大都通惠河歸德府黃河  
杭之鹽官海塘皆嘗治之具有蹟效後以浙東道

宣慰副使致仕有所著水利書十卷行於世今人  
稱畫馬必曰任水監云子子昭亦能畫

瞿霆發字聲父上海人幼穎悟才氣不羣元兵次  
臨安率衆歸附境賴以全擢進義校尉授兩浙運  
司副使海潮壞鹽場死者萬計傾力救之流亡復  
還鹽事以集拜都轉運使浙東饑稽戶數第物力  
而均之課更以最聞

明杜隰字宗原華亭人祖元芳父希仲俱有文名隰

學行並高洪武初中詞科為太常贊禮郎奉使編  
甸詰其不庭以其人入貢稱旨授禮科給事中所  
著有雙清集弟桓亦有詩名

王公亮華亭人洪武中為吏科給事中升應天府  
丞永樂初調四川右布政復調廣東居官簡靜知  
大體廉重愷悌所至人皆悅服

任勉之字近思華亭人洪武甲戌進士知鄱陽縣  
令有不便者或為匿名書詆之下令曰告我以過

是忠於我也累官福建參政宣正間政事文章以  
勉之為稱首

陳貞字景祺華亭人洪武中舉為禮部主事帝謂  
其見事明敏命攝部事永樂初歷遷河南參政黃  
河決勞來有方民不失業盜發汝寧以計離其黨  
降其首於均山子詢字汝同永樂戊戌進士選庶  
吉士天順二年以國子祭酒致仕卒天性剛直文  
章清勁主考兩京及為司成所獎拔士後皆為名

臣

王鍾字公簾華亭人洪武中以薦為燕府紀善侍世子守北京恭慎小心甚為世子所重永樂元年陞戶部右侍郎為人端厚沈靜從容詳雅事無留滯僚友多服其能卒洪熙初帝恩舊勞謚以僖敏何廣字公遠華亭人洪武中以貢授縣令遷御史至陝西按察副使人謂其任郡邑則為循吏在風憲有澄清志位藩垣得大臣體精於律學所著有

律解辯疑

夏禮字公立上海人洪武中入太學拜御史疏劾  
勲貴忤旨出為知縣永樂時復以薦為御史遷陝  
西按察副使積歲疑獄一言而決

葉宗行華亭人讀書尚氣節永樂中東吳大水宗  
行上書請濬范家浜引黃浦水歸於海帝善其言  
命從夏尚書原吉治之水患果息原吉薦其才擢  
知錢塘縣役均訟簡決獄如神按察使周新風采

嚴峻尤重之嘗伺宗行出潛窺其舍惟笠澤銀魚  
乾一裹新嘆息而去時呼為錢塘一葉清同邑張  
昕字賓陽亦佐原吉治水議與宗行合以薦授戶  
部郎又里人周顯有幹略當事濬吳淞故道倚其  
才以成大役

黃翰字汝申華亭人永樂壬辰進士累官山東按  
察使豪邁多權略凡疑獄一問即決江西人以妖  
術惑衆廣東畜蠶毒採生殺人皆捕誅之仍刻石

著解蠱方俾其術不得行

蔣性中字用和上海人宣德丁未進士有司舉故事為立表其門性中曰榮吾家曷若利吾鄉乎即移所費為石梁於鶯脰湖上往來便之除兵科給事中議節冗食以養駸勇遷江西參議論均田賦事皆施行

夏寅字時正華亭人正統戊辰進士授南京吏部主事力學為文以閔奧稱進郎中督江西學政崇

實學黜浮華知人善鑒士經其賞拔者後多知名  
陞江西參政處州民有走聚山谷者寅檄至即散  
進山東布政卒嘗謂人有三可惜此生不學一可  
惜此日閒過二可惜此身一敗三可惜所著有東  
游錄史詠諸編

張鑒字廷器華亭人正統戊辰進士景泰初授御  
史歷陞右副都御史巡撫寧夏始以輓甃城導河  
流溉靈川屯田七百餘頃後為南京兵部尚書卒

謚莊懿鑒襟度恬曠更事三朝所設施皆有成績  
五世孫仲謙萬曆中仕至雲南參政以清雅稱

唐瑜字廷美上海人景泰辛未進士授南京禮科  
給事中知衢州府有惠政擢湖廣參政置廩積穀  
歲歉民賴以濟襄河為患作隄障之歷遷山西雲  
南布政甘肅巡撫所至有聲

唐珣字廷貴華亭人天順丁丑進士為福州知府  
奸人冒中貴笞辱僉事以下官珣知其詐執而置

諸法歷右都御史總督兩廣軍務府江盜起討平之賜勅嘉勞卒於鎮

張悅字時敏華亭人天順庚辰進士授刑部主事  
歷遷吏部左侍郎南京吏部尚書改兵部致仕卒  
謚莊簡悅操行清謹提學浙江甄別才器為士類  
所信服在湖廣執法不阿成化時中官尚銘在東  
廠任事衆競趨其門悅獨不往銘敗悅名益彰在  
吏部為尚書王恕所倚信嘗兩攝選衆稱公允

張弼字汝弼華亭人成化丙戌進士由兵部郎出知南安府其地當兩廣要衝亡命者聚山谷為民害弼至悉平之大庾嶺路險隘取商稅就工闢之架橋甃石二十里以便行者毀淫祠立社學俗為一變弼襟度恬曠而敦尚行履以風節自持為詩清健有風致尤以草書名

張誥字汝欽華亭人成化丙戌進士選庶吉士改監察御史出按湖廣有能聲歷遷右副都御史巡

撫雲南決疑獄諭亂蠻得撫綏體本邦孟密二部連兵不解誥檄諸道練兵討之皆懼而自戢

張黼字仕欽上海人成化丁未進士官南刑部郎中精於法律有里嫗訟子不孝反覆開諭且呼母為子理髮皆感泣去每有疑獄輒忘寢食以求其情子鳴鳳字世祥弘治進士令永康有政績擢御史抗章劾劉瑾削籍瑾敗復官終湖廣副使

顧清字士廉華亭人弘治癸丑進士選庶吉士歷

遷侍讀以守正不阿為逆瑾所嫉降編修尋調南  
京兵部員外郎瑾誅復原官擢禮部右侍郎引年  
乞休陞尚書致仕卒謚文僖清好學敦節行士論  
重之嘗疏請武宗預定儲位諫巡幸世宗繼統凡  
迎駕頒詔諸大禮援古証今所議得體

李希顏字原復華亭人弘治癸丑會魁正德中以  
廣東僉事奉表詣闕時逆瑾擅權希顏獨不踵其  
門京師稱鐵腰李進參議露章劾梁文康子暴橫

奪俸歸尋起原官遷雲南按察使以勞瘁卒官

黃明字天章華亭人弘治癸丑進士厯南兵部車駕司郎中中貴憚之無敢託公差濫索馳傳者出守汀州值會勦屬邑武平寇或議括民財充軍餉明出官帑羨金給之境內無擾遷雲南副使致仕曾孫廷鳳字孟威官武定知府廷鵠字孟舉官順天通判皆有聲

楊瑋字伯玉華亭人弘治丙辰進士授工部主事

奏貴戚張氏挾寵撓法罪其家奴數十人遷光祿  
寺丞武宗日索子鵝腦數十頭作畫眉食璋對中  
官言狼籍用物謫隰州同知陞知瀘州時征鄧茂  
七瑋單騎入賊巢招撫其餘黨皆解甲降歷四川  
副使致仕卒弟璡字仲玉由進士厯官應天府丞  
璡子秉義字士宜嘉靖間官給事中有直聲

張弘至字時行華亭人弼子弘治丙辰進士改庶  
吉士授刑科給事中言初政漸不克終八事甚切

直於時政多所匡救凡弘宜字時措由進士厯廣  
西兵備以勞卒官

孫承恩字貞甫華亭人父衍字世延成化進士知  
延平府辦盜寃禁火化俗為之變歲旱步構烈日  
中得疾卒承恩正德辛未進士入翰林世宗登極  
以庶子充經筵講官多所發明累擢禮部尚書掌  
詹事府時齋宮設醮承恩獨不肯冠黃冠遂乞致

仕歸卒謚文簡

吳稷字舜弼華亭人正德甲戌進士授金華推官時章文懿懋家居講學嘗造請以質所疑移惠州以執法忤直指遷徽王府長史王素驕稷進賢王箴及芸窓賦規之因王自號芸窓故稷以名賦尋致仕歸隱於東郊多著述嘗佐顧文僖清修府志富好禮字子超華亭人正德庚辰進士官刑曹郎有清慎名御史馮恩以論冢宰汪鋐下獄好禮力爭謂無死法鋐銜之出守重慶遷建昌副使境有

大渡河行者觸瘴多死好禮鑿山涇塹築塘堡數百里屬之省城尋乞歸

徐階字子升華亭人嘉靖癸未廷對第三人授編修以議孔子王號謫官於外久之召拜司經局洗馬歷進禮部尚書兼文淵閣大學士與嚴嵩同在相位嵩每忌之而帝委任階亞於嵩嵩既敗階當國盡反嵩所為保全善類詔獄漸虛任事者皆得以功名終一時翕然稱名相隆慶中予告歸里萬

歷初卒年八十一贈太師謚文貞弟陟字子明嘉  
靖丁未進士歷官南京刑部侍郎性貞介兄居政  
府不因之以取顯達人多重之陟子琳以父任歷  
楚雄知府有惠政階至孫本高官錦衣千戶以拒  
魏忠賢建祠奪職崇禎初累官左都督

潘恩字子仁上海人嘉靖癸未進士授知州歷遷  
浙江參政按部海鹽倭寇猝至圍城數十匝恩力  
禦之危城得全巡撫河南徵恭王子多掠良家子

占民田賊殺無辜恩發其罪論廢徙伊庶人忮惡  
尤甚剪其羽翼累擢南京工部尚書左都御史致  
仕卒謚恭定子允哲字伯明允端字仲履皆舉進  
士居官有名

馮恩字子仁華亭人嘉靖丙戌進士授行人擢南  
京御史論罷南北郊彗星見劾張孚敬汪鉉方獻  
夫為根本腹心門庭三彗下獄論死會審起立不  
跪辨甚強時稱四鐵御史謂其口其膝其膽其骨

皆鐵也子行可上疏請代死得減戍雷州後赦歸  
隆慶初進大理寺丞卒

陸樹聲字與吉華亭人嘉靖辛丑進士第一選庶  
吉士歷遷禮部尚書予告歸卒年九十七謚文定  
樹聲性恬默而嚴重有骨氣張居正當國欲引以  
為重樹聲介然不屑也嘗陳四方災異又論時政  
十事語甚切報聞而已通籍六十四年先後多請  
告家居官於兩都不及一紀海內皆仰其清德子

彥章字伯達萬曆己丑進士授行人以父老在職  
二年即乞終養給半俸異數也後厯官至南京刑  
部右侍郎工詩文善書法

楊允繩字翼少華亭人嘉靖甲辰進士以行人擢  
兵科給事中疏屢上皆報可又論大臣受餽遺不  
貲語尤切尋巡視光祿勅寺丞胡膏虛冒物料膏  
誣構允繩欺謗齋醮遂下獄論絞死西市隆慶初  
贈光祿少卿謚忠恪

周恩兼字叔夜華亭人嘉靖丁未進士授平度知  
州歲祲旁郡飢民掠食且為亂思兼作小木牌數  
千散置四郊令飢民執以入城給銀米諭之復業  
衆遂定擢工部郎督厥清源募民囊土築河堤堤  
成三日秋漲大發民賴以全除湖廣僉事宗人有  
倚藩府勢為不法者悉案正其罪遷廣西提學未  
赴而卒子紹元字希安隱居績學工八分書紹節  
字希允以病謝諸生杜門著書兄弟友愛知名於

時紹元子裕度工楷篆以孝聞

龔愷字次元華亭人嘉靖丁未進士為御史仇鸞之開馬市也帝命尚書史道主之愷劾道委靡遷就誤國事帝方向鸞謂愷等借道論鸞杖八十奪俸按粵西列靖江王驕恣狀復疏止大征粵寇帝是其議遷湖廣副使歸

董傳策字原漢華亭人祖恬弘治進士官刑部錄囚多平反歷大理少卿傳策嘉靖庚戌進士除刑

部主事抗疏劾嚴嵩六罪下獄拷掠會地震謫戍  
南寧隆慶初召復原官累遷至南京禮工二部侍  
郎

唐自化字伯咸華亭人嘉靖癸丑進士授將樂令  
治行稱最徵拜御史查補直隸山東山西積逋疏  
奏畿甸之下宜從寬卹詔罷其征都人大悅改行  
人司司正歷兵部郎中長於治劇剖決如流本兵  
楊博最重其才卒於官子本堯字世承隆慶辛未

進士由金谿令擢御史巡視十庫光祿奏逐中貴之侵冒者數人終貴州參政

陸樹德字與成樹聲弟嘉靖乙丑進士由推官陞刑部主事改禮科給事中穆宗時疏言上下交為泰非與公卿輔弼相論難何以廟君德酬萬幾又條議諸邊計甚悉累擢右僉都御史出撫山東請裁募兵費戒苛罰俱報可後移疾歸

林景暘字紹熙華亭人隆慶戊辰進士選庶吉士

授禮科給事中神宗初政進十二箴以獻轉兵科  
左巡視京營請廣召募選鋒均糧凡十餘事厯遷  
南太僕卿歸數薦竟不出家居時應撫令所屬縣  
田出助役錢率七十畝徵一金景陽力爭得減十  
之七子有麟以父蔭官至龍安知府以清謹稱

許樂善字修之華亭人隆慶辛未進士為郊縣令  
擢御史首輔張居正奪情總憲率諸御史上公疏  
慰留樂善為居正門下士獨不署名按畿南有橐

強令倚勢為不法劾治其罪尋掌河南道典內計  
條上六事遂著為令甲又疏請停礦稅救建言御  
史曹學程舉朝稱之歷遷南京通政使請告歸卒  
唐文獻字元徵華亭人萬曆丙戌廷試第一授修  
撰為東宮講官每講畢大璫出揖不通一言輔臣  
沈一貫忌侍郎郭正域剛直欲以妖書事陷之文  
獻邀同列力白其誣正域獲免給諫李沂劾大璫  
廷杖文獻徒步掖之手調湯藥人多其義歷禮部

侍郎掌翰林院卒謚文恪從子諸生允振字叔起  
有文行

王孫熙字君文華亭人萬曆乙未進士授缺

入為大理評事有大璫坐重辟行萬金求免孫熙  
曰爾金如山我案如山論如律為台州知府地有  
麻枲民不知織生女多不舉乃購工教以經緯之  
法嚴溺女之禁久之所育女皆任織名王公布子  
元瑞官御史有清名

張以誠字君一弼玄孫肆力於經史百家朝章典故莫不該洽萬曆辛丑廷試第一人授修撰遷左中允疏請東宮出御講筵以重國本慰人心詞旨愷切尋轉右諭德丁外艱歸以哀毀卒以誠舉止安雅敦尚名節士論推重

張鼐字世調華亭人萬曆甲辰進士由庶吉士遷遷少詹事上疏言事語斥近倅魏忠賢惡之擢南京禮部侍郎引疾去忠賢削其籍鼐砥礪名節為

文章通達國體崇禎初起原官

黃體仁字長卿上海人萬曆甲辰進士時館相國  
李廷機家使試館職謝曰某老矣不足以辱此選  
門人徐光啟可也光啟遂入翰林而體仁為主事  
歷知登州府罷坊市雜稅脫建文忠臣陳迪子孫  
於成籍擢東充道副使值歲祲而福王之國請盡  
革迎謁供億諸費民德之當路不悅罷歸撰續上  
海志田賦諸篇最詳覈云

徐光啟字子先上海人萬曆甲辰進士選入翰林以少詹兼河南道御史練兵通州賜勅如巡撫歷禮部右侍郎為魏黨所劾落職崇禎初召還轉左日食失驗光啟言歷久必差宜及時修正乃置局修歷以光啟領之得元太史令郭守敬之意而法加密進禮部尚書尋拜東閣大學士卒於位謚文定所著有農書歷指漕河議兵事危言等書

錢龍錫字稚文華亭人萬曆丁未進士選庶吉士

歷南京吏部侍郎魏璫銜其不附已削其籍崇禎  
初年用枚卜拜東閣大學士改文淵閣以定逆案  
深為羣小所嫉因袁崇煥獄陷之死帝以龍錫素  
循謹詞臣黃道周等力救久始得遣戍

夏嘉遇字正甫華亭人萬曆庚戌進士授保定推  
官廉惠為畿輔冠擢禮部主事時給事中亓詩教  
御史趙興邦挾政府恣為奸橫嘉遇五上疏劾之  
亓趙自引去時論快焉天啟初家宰趙南星用物

望自南吏部召為銓司署選事魏瑞屬其姻黨誣奏被斥歸崇禎初贈太常少卿

錢士貴字元沖華亭人萬曆庚戌進士由知縣擢御史議移宮紅丸梃擊三案請誅李可灼論政府罪如律會魏忠賢竊政反三案以傾朝士遂謝病歸崇禎初起故官歷南大理寺丞以疾告家居十餘載力行善於鄉後召為刑部侍郎未至卒

許譽卿字公實華亭人萬曆癸丑進士由推官拜

給事中抗疏極論魏忠賢罪又陳時弊言嚴衛流  
毒宦官內操忠賢益怒鐫秩歸崇禎初起原官陳  
五事規切廷臣有許之者遂自引去久之復起流  
賊毀鳳陽皇陵譽鄉憤激發大臣玩寇之罪後削  
籍歸

董羽宸字邃初上海人萬曆癸丑進士授餘姚令  
報最擢御史巡視山東預平白蓮妖賊歷遷吏部  
侍郎剛方獨立忤時相被劾歸時同邑何萬化字

宗元萬曆壬戌進士歷官湖東參政亦平境中妖  
賊之亂

張履端字旋吉華亭人萬曆壬子與兄拱端弟軌  
端同舉於鄉丙辰成進士知晉江東鹿二縣在晉  
江分校戊午鄉試得漳浦黃道周在東鹿有惡少  
結黨白晝刦殺人吏莫敢問履端誅其首惡境以  
寧滹沱河數決為城患乃去河二十里作新城規  
制詳密民忘其邊天啟中擢兵部主事以草疏忤

璫斥歸崇禎初起吏部未赴卒弟軌端字方同知邵陽縣楚賊犯境約苗兵赴急大破賊於天王寺有旨獎賚會卒

王陞字超之華亭人萬曆丙辰進士為兵部主事偕同官張履端代尚書草疏請省刑薄斂大忤權璫意去職崇禎初補本官歷郎中薦總理盧象昇專督楚豫以靖寇六合縣舊無城當寇証淮泗陞請以兵部所省江南驛站銀築之累擢太僕寺少

御以忤時相歸

杜喬林字君遷華亭人萬曆丙辰進士由主事出  
知湖州府枕太湖故多盜時王崑崙等竊發喬林  
密謀捕擊五十餘日羣盜悉平累遷浙江右布政  
使分巡溫處到官六日海寇劉香老入犯圍府城  
晝夜捍禦廉得賊諜誅之出兵奮擊三戰皆捷以  
病告歸子麟徵字仁趾由進士官刑部主事疏諫  
大瑞總理部務及出監宣大諸鎮事

葉有聲字君實上海人萬曆丙辰進士己未廷試  
由侯官知縣擢給事中論勤政治體言路仕途四  
事尋以忤魏璫削籍崇禎時歷遷河南按察使兩  
禦流寇有功後以左副都御史免官屏居村墅以  
壽終

陳所聞字無聲華亭人萬曆己未進士授刑部主  
事時奄勢方燄內侍劉朝李進忠輩繫獄諸郎無  
不通殷勤獨所聞視之如常囚俄調工部主事董  
不

作山陵奄人監護恣乾沒所聞莅事精敏虛冒無所容羣奄奪氣

董象恒字有仲華亭人萬曆己未進士知開州白蓮賊倡亂捕斬之歷福建參政討鄭芝龍有功擢僉都御史巡撫浙江捐俸造漕船五百以濟運時流寇竊發各省多殘破兩浙獨完象恒之力為多

趙東曦字馭初上海人萬曆己未進士由知縣擢

給事中論加派預徵搜括捐助皆苟且之政請興屯塞下以充軍用又劾奏奄人王坤監視失策乞正其罪悉罷中使監鎮之任忤旨調外

張昂之字匪激華亭人天啟壬戌進士授盧陵令郡紳有素附魏忠賢欲改文天祥白鷺書院建璫祠者昂之力格其事遂為所構削籍歸崇禎初起兵部主事知保寧府張獻忠寇蜀昂之召募勇銳梟其大帥措餉給兵士力保巖疆以功遷川東道

尋告歸

沈匡濟字方平青浦人天啟壬戌進士授錢塘令時勢家侵占西湖為園田愚釐正之歷官山東提學副使初在浙分校甲子鄉試烏程凌忠清義渠其所取士也

李世祺字壽生青浦人天啟壬戌進士由行人擢給事中陳大計當定者二大獎當去者三帝納之力言中官監視諸鎮之非不能用又疏劾時相溫

體仁吳宗達忤帝意貶官後起行人司副厯遷太  
僕卿

包爾庚字長明華亭人明季以進士知廣東羅定  
州戢悍兵雪冤獄弭峒徭之變民建祠祀之以卓  
異徵不赴

國朝張安豫字子建華亭縣人由太學生授齊東丞值  
東省饑盜起安豫單騎入龍山賊營諭以禍福皆  
解甲降擢齊河令督餉入京順治初授金華府知

府招徠綏輯政績大著遷浙西守道

張安茂字子美華亭人以誠子順治丁亥進士授工部主事分校戊子北闈稱得人兼綜漕務宿弊盡革歷浙江提學僉事輯泮宮禮樂全書遷陝西西寧道副使

諸舜發字陶叟青浦人順治丁亥進士授戶部主事歷陝西提學僉事請屬不行試卷高下皆手自閱定以積勞卒綏德州官署所遺惟圖書數卷而

已

周茂源字宿來華亭人順治己丑進士歷刑部郎中授處州知府處山路險仄募民開鑿二百餘里自是所過若坦途又招集流亡給牛種墾田一千八百餘頃以逋誤左遷歸日事著述有鶴靜堂集子綸字鷹垂有文名

王廣心字伊人華亭人順治己丑進士授行人厯主事擢御史巡視京通二倉漕政自明季以來奸

弊百出廣心事事釐剔疏凡三十餘上清操凜然  
雖大猾不敢撓又修築通會河運道輸挽無阻以  
親老乞歸所為詩文宏麗有集

許纘曾字孝修華亭人明通政使樂善曾孫順治  
己丑進士選庶吉士陞中允以才堪外任轉江西  
驛鹽道理郵政以豁民累除鹺蠹以通商引遷川  
東道時寇孽未殄從征萬州及取大昌皆有功擢  
河南按察使蒞職勤敏刑獄一清以事罷復補雲

南按察使尋乞終養歸

陸振芬字令遠華亭人順治己丑進士時兩粵未定破格用才特擢嶺東惠潮道隨大軍進討諸郡邑以次削平抵任後招流亡省徭役民遂大和癸巳四月駐潮總兵郝尚久作亂兵圍道署振芬誓死不屈密遣家人齎蠟丸牒請兵勦賊尚久伏誅

力辭題敘引疾歸里

沈荃字貞蕤華亭人明大理卿粲裔孫父紹曾有

至行聚徒授業荃順治壬辰廷對第三人授編修  
出為河南大梁道有政績游歷詹事府詹事卒謚  
文恪荃學行醇潔名重館閣書法尤推獨步為

聖祖所賞士以一長來謁者輒為虛植子宗敬字南季兼  
工書畫康熙戊辰進士仕至四譯館卿

顧大申字見山華亭人順治壬辰進士授工部主  
事分司夏鎮河道節省公費築城以守人服其廉  
幹晉郎中出為陝西洮岷道僉事卒於官平日留

心經濟所著河渠論言水利者多採用之

施維翰字及甫上海人順治壬辰進士授臨江推官陞御史在臺班十七年所條奏皆闢大體累擢右副都御史巡撫山東遷浙江總督前院疏劾軍士鼓譟一案繩紏二百餘人維翰至即日會讞多所平反調福建總督未抵閩署卒謚清惠

王日藻字印周華亭人陞孫順治乙未進士授工部主事由員外郎出為河南提學僉事報最擢參

議補河道累遷浙江按察江西布政使所蒞有聲  
晉副都御史巡撫河南疏請開墾荒田四十四萬  
餘頃悉成沃壤分轄河務籌畫精密內遷刑部侍  
郎轉戶部歷工戶二部尚書賦役諸政裁斷允愜  
以事落職復起總理高堰河工勤瘁卒工所特復

原秩

王頊齡字顥士廣心子康熙丙辰進士授太常博  
士己未薦舉博學鴻儒改授編修纂修明史歷工

部尚書武英殿大學士雍正初以老乞休

上手勅慰留年八十四卒於位贈少傅謚文恭頃齡初以文學進游歷卿曹諳練典故在政府八載恪誠純一以風度稱弟九齡字子武康熙壬戌進士由庶吉士厯官左都御史恬靜有雅量

高層雲字二鮑華亭人明檢討承祚孫康熙丙辰進士授大理寺評事擢吏科給事中章奏屢上皆秉禮執法多所彈正遷通政司右參議厯太常寺

少卿卒官脣雲工詩文善書畫得者寶藏之

王鴻緒字季友廣心子康熙癸丑進士廷對第二人授編修厯侍讀學士妖人朱方旦以左道煽惑一時鴻緒特具疏列其三大罪方旦伏法累擢左都御史總裁明史自工部尚書轉戶部解任歸後復修詩經傳說彙纂及省方盛典並為總裁官

張集字殿英上海人康熙丙辰進士授行人擢御史疏免漕田丈量以除民累及釐軍政嚴保題等

事糾庸懦提鎮不避怨嫌歷官至吏部侍郎連丁  
內外艱服闋補兵部左侍郎尋謝病歸集性樸儉  
為大臣自奉若寒畯以德量稱

顧昌祚字受周上海人康熙己酉舉社闈授江華  
知縣粵西苗為患唯猺能禦之前令尅減歲賞遂  
不用命昌祚如額以給猺悅服悉力抗禦四境帖  
然後以忤上官意左遷

徐賓字虞門華亭人康熙戊辰進士授臨城令有

山名紫壺套邑之奸民多嘯聚其中賓單騎諭降之總理宣沙與桃花口牧馬皆著勞績以卓異徵授戶部主事擢吏科給事中轉刑科掌印詳陳積貯以杜侵漁及請截漕米賑山東饑悉見施行

曹泰曾字彙初上海人康熙戊午鄉薦授莆田令清賦簡訟御史嚴察有大姓殺人賄府求脫泰曾力持之卒正其罪條邑中利弊六事請之上官銳意興革尋坐執法被劾罷從弟炯曾由貢生知贛

縣亦著政聲

廖鳳徵字樾阡華亭人選拔入都大學士陳廷敬重其才品延為二子師康熙癸酉舉人闈選授林縣令邑素剽悍難治鳳徵訓以禮法俗為一變又均平戶役民懷其德丁內艱歸

江南通志卷一百四十一

欽定四庫全書

江南通志卷一百四十二

人物志

宦績

常州一府

常州府

後漢王闢字選公無錫人明易及天文更始中為侍  
御史終陳留太守不交豪強人號王獨坐

彭循字子陽毘陵人建國二年海賊丁儀等萬人

據吳太守聞循勇謀以為邑令循曉儀利害應時  
散去民歌之曰時歲倉卒賊縱橫大戰強弩不可  
當賴有賢令彭子陽

三國吳周鯊字子魚陽羨人父賓少折節好交友廣  
平多政績鯊舉孝廉為寧國長錢塘大帥彭式為  
寇以鯊為令旬月平之遷丹陽西部都尉鄱陽太  
守誘魏大司馬曹休入皖邀擊勝之在郡十二年  
恩威並行子處見忠節

晉周玘字宣佩處長子強毅沈斷有父風烈石冰據江夏陳敏反揚州及錢璗寇陽羨皆率兵討斬之三定江南元帝特置義興郡以旌之為吳興太守甚有威惠百姓敬愛卒謚忠烈

南北朝齊蕭惠基思話第三子姊為桂陽王休範妃休範叛高帝以惠基為軍副了不自疑袁粲劉秉起兵秉是惠基姊夫惠基安靜無預帝益恩信永明中為侍中尚書令

蕭赤斧南蘭陵人為雍州刺史勤於奉公不營產利累遷太子詹事卒於家貧無絹為食子穎胄好文義穎達好武勇武帝曰兄文弟武宗室便不乏才後穎胄歷官侍中尚書令穎達終左衛將軍

蕭緬字景業南蘭陵人自五兵尚書出為吳郡太守有能名歷遷雍州刺史所部畏愛及卒喪還百姓緣沔水悲泣設祭峴山為立祠

周山圖字季寂義興人宋元嘉中領白衣隊拒魏

兵於瓜步以功加鎮軍將軍後事齊高帝勸帝除  
沈攸之及攸之攻郢城預策其不能克又贊世子  
頤留屯溢口帝是之領御前西廂直衛

蕭敷字仲達南蘭陵人少有學業為隨郡內史招  
懷遠近士庶安之以為前後之政莫及明帝深稱  
敷風化之美

蕭嶷字宣儼蘭陵人都督荊州初沈攸之聞人告  
計囚繫甚衆嶷至鎮一日遣三千人市租素重悉

為寬假及為南蠻校尉開館立學風教大振

梁蕭景字子昭南蘭陵人初仕齊為永寧令政為百城最武帝踐阼歷南兗雍二州刺史吏人畏敬抄盜絕迹又監揚州尤稱明斷遷都督郢州復有能名卒謚曰忠子勵歷守淮南宣城豫章皆有善政及遷廣州去豫章人吏俱齋糧食遠送數百里

蕭昂字子明景弟歷輕車將軍監南兗州初兄景為兗州德惠在人及昂來代時人方之漢馮氏終

江州刺史

蕭洽字宏稱惠基子齊永明中舉明經梁為南徐州治中近畿重鎮前後居者皆致巨富洽清身守職妻子不免饑寒累遷臨海太守為政清平不尚威猛

蕭介字茂鏡南蘭陵人少穎悟有器識大同中為武陵王府長史以清白稱出為始興太守甚著威德歷遷都官尚書每軍國大事必先訪介帝謂朱

異曰端右才也太清中帝納侯景介上表極諫帝省表嘆息卒不能用

蕭琛字彥瑜惠基從子起家齊太學博士天監中遷吳興太守郡有項羽祠於郡廳事安神座多避舍琛至叱曰生不能與漢祖爭中原久據此何也撤之後頻益大郡有名聲不事貲產

陳蕭引字叔休介子方正有器度避侯景亂南適嶺表廣州刺史歐陽紇有異圖引數規正之及陳平

番禺引北還歷庫部侍郎掌知營造自呂梁之敗  
戎儲空匱引在職一年器械充足後主即位為中  
庶子建康令以請屬不行被譖免官

唐蕭瑀字時文梁明帝子也以女兄為隋晉王妃歷  
拜內史侍郎出守河池郡擊降部內鈔賊萬人又  
擊走薛舉後歸唐封宋國公署秦王府司馬委以  
樞筦與房杜不協屢免官輒復起太宗嘗賜詩曰  
疾風知勁草板蕩識誠臣後拜太子太保同中書

門下三品卒詔贈司空曾孫定為袁潤等六州刺  
史治最擢太子少師贈太子太師

蕭鈞璫從子永徽中累遷諫議大夫弘文館學士  
能直諫終太子率更令子瓘渝州長史居母喪毀  
卒瓘子嵩有定瓜州擊吐蕃功授同中書門下三  
品中書令子衡衡子復復子湛湛子寘寘子邁皆  
宰相衡弟華華子恒恒子俛俛弟悟悟子倣亦宰  
相自璫至邁凡八葉

蔣儼義興人貞觀中擢明經第為右屯衛兵曹參  
軍太宗將伐高麗募為使人皆憚行儼獨奮然請  
往為莫離支所執以兵脅之不屈高麗平得歸帝  
壯其節授朝散大夫高宗朝進蒲州刺史摘伏戢  
姦號良二千石後封義興縣子

高智周晉陵人舉進士為費令取俸與丞尉均民  
安其化累遷壽州刺史治尚文雅行部先見諸生  
質經義及政得失既乃錄獄訟課耕桑儀鳳初拜

同中書門下三品卒年八十二謚曰定

薛登義興人父士通隋末為鷹揚郎將江都亂據城拒賊武德初持地自歸終泉州刺史登通貫文史少與劉知幾齊名武后時累遷左補闕疏言選舉不宜濫又諫四夷質子不宜留京師出刺常州有政績遷左丞睿宗初為御史大夫忤太平公主出為岐州刺史後歸田家苦貧詔給致仕祿

蔣乂字德源義興人有史才貞元間厯官起居舍

人轉司勲員外郎兼史職嘗疏裴延齡罪惡拒王  
叔文不與交當世高之元和中預修德宗實錄累  
遷祕書監卒謚曰懿長子係官史館修撰參修憲  
宗實錄踵修國史次子伸相宣宗季子偕歷史官  
修撰撰唐歷及文宗實錄俱有名

徐仁紀晉陵人聖歷中授右拾遺數論事不合遂  
移疾歸神龍初宣慰使表其行可勵俗召拜右補  
闕復抗言出為靈昌令

宋張觀字仲實昆陵人南唐進士歸宋拜監察御史會三司言劍外賦輕詔觀往按諸州稍增之觀疏言不便太宗然之歷知黃州揚州皆有善政雅好論事辭理切直遷廣南轉運

蔣堂字希魯宜興人舉祥符五年進士官監察御史禁中火宮人多屬吏堂言火起無迹宜修德應變歸咎宮人是重天譴詔原之論郭后不當廢坐贖知越州奏復鑑湖之為豪右侵者為江淮制置

發運使厯守蘇杭二州以尚書禮部侍郎致仕卒  
清修好學有吳門集二十卷

胡宿字武平晉陵人舉進士尉揚子救溺數千人  
通判宣州決婦殺其夫之獄以出平民之被誣者  
知湖州築石塘百里捍水患民號曰胡公塘召知  
制誥言禮部貢士當用三年之制從之唐介貶嶺  
南中使護往宿言介如道死受殺直臣名帝為追  
還中使拜樞密副使言南北通好六十年不宜以

捕魚伐葦細事生釁卒諡文恭子宗炎善為詩藻思清婉舉進士官鴻臚卿館遼使能尊國體歷知

密州卒

錢公輔字君倚武進人少從胡瑗學第進士甲科知明州進知制誥英宗立陳治平十議以不草翰林學士王疇制謫滁州團練使神宗初復知制誥兼知諫院忤王安石出知江寧府帝欲召還安石扼不可徙揚州提舉崇福觀卒

錢顥字安道無錫人慶歷六年進士知烏程贛二  
縣皆以治行聞治平末召拜監察御史襄行王安  
石行新法顥論其談堯舜而首財利謫衢州監稅  
後徙秀州家貧母老丐貸以給朝夕蘇軾贈以詩  
有烏府先生鐵作肝之句世因目為鐵肝御史

葛宮字公雅江陰人舉進士知南劍州土豪彭孫  
憑山澤為盜宮遣沙縣尉諭降之並溪山多產銅  
銀吏挾姦罔利課歲不登宮變其法歲羨餘六百

萬三司使聞於朝論當賞宮曰天地所產吾顧盜之又可為功乎徒知滌秀二州秀介江湖間吏為關涇瀆上以征往來者民苦之宮命撤毀厯官工部侍郎

蔣之奇字穎叔堂從子舉嘉祐三年進士官太常博士擢御史上謹始五事厯淮東轉運副使修水利以食流民揚之天長宿之臨渙橫斜三溝尤其大者溉田至九千頃擢江淮荆浙發運副使元豐

六年漕粟至京師計六百二十萬石鑿龜山至洪澤為新河以避淮險自是無覆溺之患知廣州以平寇功除寶文閣待制紹聖中進翰林學士鄒浩以言事獲罪之奇貽書通問責守汝州徽宗立召還擢知樞密院事尋罷之奇為部使十二任六典會府以幹辦稱

胡宗愈字完夫宿從子舉進士甲科宿謝政英宗問子弟誰可繼者以宗愈對召試學士院神宗立

兼知諫院爭李定不當為御史忤王安石通判真  
州歷御史中丞哲宗問朋黨之弊具君子無黨論  
以進擢尚書右丞知成都以清靜稱拜吏部尚書  
卒

錢即字中道宜興人舉熙寧九年進士崇寧中為  
陝西轉運判官轉餉稱最召對陳靈武大砦泉不  
可取知慶州築安邊城包地萬頃縱畊其中歲得  
粟數十萬知延安府童貫宣撫陝西高估金帛賤

入民粟關中騷然即極陳其害貶永州團練副使  
起知興仁府徙太原卒謚忠定

余中字行老宜興人熙寧五年偕兄貫試禮部中  
預選而貫黜請黜已而薦兄有司雖不許士論嘉  
之次年魁廷對紹聖二年使遼還奏河朔城隍隳  
圯乞葺治以戒不虞宣靖間金人長驅入議者始  
思其言以諫新法忤旨謫雪川守致仕

邵材字聖規宜興人熙寧間與父潛同舉進士嘗

為監察御史郡上疑獄刑部議當貸死用事者以為不當貸仍欲坐言貸者材抗言如此恐獄吏由此不復以疑獄聞矣時司馬光極論新法之害王安石屬材効光材曰君實正人可厚誣乎即自効歸

蔣靜字叔明宜興人元豐中舉進士調安仁令俗好巫疫癘流行病者寧死不服藥靜悉論巫罪毀涇像三百投諸江徽宗時歷顯謨閣待制知江寧

府茅山道士劉混康以方技得幸其徒倚為姦利  
靜皆置之法

鄒浩字志完晉陵人元豐中舉進士哲宗朝官右  
正言有請以王安石三經義發題試士者浩論其  
不可陝西奏邊功中外皆賀浩獨言持勝為難京  
東大水浩言宜思消復之實塞序辰看詳元祐章  
奏詆欺不平浩言威福操柄不宜下移又劾章惇  
不忠慢上未報賢妃劉氏立復力爭不可惇詆其狂

妾削官羈管新州徽宗立召還遷左司諫蔡京用事責衡州又竄昭州五年始得歸稍復直龍圖閣疾作楊時往省之僅存餘息猶眷眷以國事為問語不及私高宗即位贈寶文閣直學士謚曰忠子柄陳瓘稱其才高識遠仕終天台守

胡交修字已懋宗愈從子崇寧中進士中詞學兼茂科建炎中歷給事中直學士院李成盜江淮朝議親征上言此將帥之責不足辱王師議遂寢時

欲以四川交子行之諸路極陳不可又諫大舉之  
非薦從子世將守蜀號稱名帥出知合州卒交修  
三入翰林號稱職自宿宗愈至交修世將皆任禁  
林文修裒次為書號世絲綸集以侈一門之盛

胡世將字承公宿曾孫與交修同舉進士累官刑  
部侍郎出知洪州兼江西安撫使建昌兵變以便  
宜發兵討平之知成都府安撫四川吳玠以軍乏  
糧奏請用世將議用轉般措運之法軍儲稍充公

私便之玠卒代宣撫川陝拒守有功收復隴州破岐下諸屯以疾卒於軍謚忠獻

霍端友字仁仲武進人舉崇寧六年進士第第一歷官禮部侍郎疏請侍從補外即請郡除待制知陳州陳地汙下久雨積澇水不時洩乃益開新河二百里達於淮水患遂去致仕卒

胡珵字德輝晉陵人宣和中進士受學於楊時太學生陳東上書珵為潤色其文又與李綱同舟東

下謫梧州召為史館校勘趙鼎當國以熙豐元祐  
舊史蕪穢屬程筆削以論和議忤秦檜罷

張守字子固晉陵人舉進士再中詞學兼茂科厯  
監察御史高宗駐蹕維揚上防淮渡江六事忤執  
政意遣撫諭京城還奏金人必來願蚤為備知福  
州止築城之議時諸將皆以獻俘為功守言西河  
山東民皆陛下赤子驅迫以來宜貸使歸願留者  
聽又請蠲閩民貸常平緡錢十五萬召拜參知政

事徙知紹興府建康謀帥上曰建康重地大臣有  
德望者惟張守可至鎮卒謚文靖孫抑戶部侍郎  
周葵字立義宜興人宣和六年進士高宗駐驛臨  
安擢監察御史徙殿中侍御史在職僅兩月言事  
至三十章後以忤秦檜落職檜死起知紹興府孝  
宗即位除兵部右侍郎手詔問錢穀出入葵言人  
主不宜留心細故必有小人導之蓋指龍大淵曾  
覲也孝宗色動拜參知政事同知樞密院卒謚簡

惠有文集奏議

喻樗字子才自祥符徙家無錫少慕伊洛之學從楊時游舉進士以趙鼎薦授祕書省正字力言和議之非忤秦檜出判衡州致仕檜死起大宗正丞歷擢浙東提舉常平以治績聞樗有人倫鑒張九成沈晦樊光遠輩未第時俱以第一人期之後果然有易義四書性理講解學者稱玉泉先生

尤袤字廷之無錫人舉進士為泰興令修築舊城

金兵入揚州獨泰興以有城得全民為立生祠遷著作郎以言事出守台州築城捍水除江東提舉常平值歲旱單車行部覈一路常平米通有無以賑貸又推行朱熹荒政於諸郡除太常少卿兼直學士院高宗恤禮廟號皆褒討定光宗即位奏願謹初戒始召除給事中繳還內除勅令擢禮部尚書力勸帝孝事重華宮袁少從喻樗游得程頤之傳方乾道淳熙間道學為人所忌袁在掖垣首言

道學有益於治道孝宗然之卒謚文簡有遂初文  
集孫靖禮部尚書

蔣芾字子禮之奇曾孫舉紹興中進士第二人授  
建康理官孝宗即位擢起居郎首奏加意邊防歷  
遷參知政事同知國用請停招兵以足食為籌邊  
志上之拜右僕射同平章事上銳意恢復力陳天  
時人事未可忤旨罷政

李祥字元德無錫人隆興元年進士歷提舉淮東

淮西運判兩淮錢不定祥奏請更鑄紹興新錢從之遷國子祭酒丞相趙汝愚去國祥上疏力爭公論藉以立卒謚肅簡

邱崈字宗卿江陰軍人隆興進士為建康府幕官以丞相虞允文薦召對言恢復之志不可忘恢復之事未易舉出知秀州華亭捍海堰廢潮歲壞田蘇湖皆被害奏築三月堰成鴻鹵復為良田累擢四川安撫使吳挺死崈乞選他將代之遂革世將

之患後挺子曇復為蜀帥遂叛人服宦先見遷刑  
部尚書江淮宣撫使金兵入淮或勸宦棄廬和守  
江宦曰棄淮則與敵共長江之險矣吾當與淮南  
俱存亡拜同知樞密院事卒謚忠定

葛邲字楚輔江陰人舉進士歷正言遷給事中外  
戚溫恩除官邲皆繳奏不行紹熙初拜左丞相專  
守祖宗法度薦進人物卒謚文定配享光宗廟

蔣重珍字良貴無錫人少從尤袤學嘉定十六年

進士第一簽判建康軍首以本心外物二者界限  
為言差通判鎮江府會火災應詔陳言上讀之感  
動端平初入對請召用真德秀魏了翁時議出師  
關洛重珍力爭不聽遂自効後以守刑部侍郎致  
仕卒謚忠文

吳懋字禹功晉陵人崇寧進士調當塗縣主簿歲  
饑官出粟糶民全集他吏監者多擾亂躁踐懋以  
灰布地疎其行列人無譁者決更十數令不決之

訟入為吏部員外郎責王時雍於政事堂至欲以  
笏擊之後知明州輯兵民著功効

耿秉字直之江陰人紹興中進士律已清方所至  
以利民為事兩為浙漕始以江陰軍認納和買絹  
疋不堪請以酒息輸代繼奏本路數邑版賦重請  
蠲減得減萬數又申請役法六事至今遵用歷官

煥章閣待制

蔡戡字定夫晉陵人登乾道間甲科持節五年所

部十四郡歲以礦銀為病戡出羨代輸民甚德之  
擢河南憲使折李昂霄之亂於方萌寧宗朝為京  
尹歲澇糴艱戡請發倉粟侂胄相請老

丁逢字端叔晉陵人乾道間進士金使來賀生辰  
怙強驕黠逢曰示弱何以為國上書乞上方劍斬  
之上批付宰相此人才氣可用令安豐盱眙二縣  
皆有殊績除川秦茶馬使屏供張修馬政累官寶

謨閣待制

强翊字君翔晉陵人元豐五年除金壇簿章惇少  
與翊善翊漸覺惇傾險心惡之惇居潤時翊任屬  
邑惇問慰殷至而翊未嘗通一書及惇以宰相起  
翊自若也尋引年致仕

元陸垕字仁重江陰人以孝友聞至元間丞相巴延  
兵南下垕時未冠直入軍門論議有合兵不入境  
奏授同知徽州路總管府事累遷浙西廉訪使抑  
豪強誅貪墨奏免儒役及舉行助役法乞終養歸

辛謐莊簡

陳文杰字漢卿武進人以薦授慶元儒學正浙東  
帥重其名遣二子就學二子挾貴胄無弟子禮羣  
蒼頭日臂鷹鵠蹣跚舍文杰呵之朴教二子奪鷹  
縱之復具以白帥帥益悚敬尋辟為掾累擢東流

尹

明毛節字伯尚武進人洪武時以三老奉事入京題  
詩金山寺上遊幸見之大稱賞即授御史巡按江

西出行部毀淫祠鋤強暴一境以寧

王思明字克明武進人洪武初以薦召侍燕邸以所校綱目及大學衍義獻卒謚康懿

朱顥字德觀靖江人洪武初以才行舉為臨江守報最擢吏部侍郎

錢本中字德文武進人洪武中以薦知吉水縣單騎入山谷中撫降亂民之嘯聚者凡數萬人後以事免父老奔走乞留學士胡廣薦之復任吉水民

聞本中來空閭并迎拜卒於官民哀慕留葬其地  
歲時奠祭之

吳肇無錫人洪武間以耆老拜御史建文中諫削  
奪親藩太驟又力言李景隆不可用丁父憂歸閭  
靖難兵入都痛哭幾絕隱孟墅以醫養母時靖江  
朱果以薦歷秦府長史文皇繼統堅乞歸田有雪

江集

胡濱字源潔武進人建文二年進士授給事中成

祖即位疑建文帝尚在遣漢徧巡天下遷禮部侍郎仁宗時陳十事並嘉納之轉國子祭酒宣德初進禮部尚書正統時奏汰法王以下番僧千餘人景泰中進太子少傅加太子太師英宗復位乞歸卒年八十九贈太保謚忠安漢喜怒不形人稱其德量厯事六帝十知貢舉

殷序字序賓無錫人永樂甲申進士厯四川布政使北京初建採木於蜀序督役有法宣德中平茂

州賊有功轉雲南致仕卒

段民字時舉武進人永樂甲申進士官刑部郎以平恕稱為山東參政時妖婦唐賽兒遁大索天下出家婦女民力為矜宥人情始安車駕北征轉餉出塞費省事給擢刑部侍郎卒謚襄介子實端介有父風累官福建參政曾孫金官戶部主事有廉聲

嚴本字志道江陰人永樂中以薦授刑部主事從

尚書宋禮採木於蜀遇烏蒙蠻持兵猝至本論以朝廷威德皆憚伏散去遷大理寺正前後皆厯法官平反冤獄甚衆

倪敬字汝敬無錫人祖父峻洪武時鄉舉官給事中諫文皇佞佛忤旨出使占城剛正不撓敬正統戊辰進士授御史出按山西戍將侵餉者悉治之再按福建時議開銀礦抗疏得寢景泰間陳敬天修德六事謫宜山縣典史天順初知祥符縣從安

遠侯柳溥西征師旋道卒

楊璿字叔璣無錫人五世同居正統己未進士累官都御史歷秦晉楚豫及撫畿內皆著聲績

王謙字益夫武進人官中書舍人因災異奏疏劄切景泰初以太常卿出守夔州治行為蜀最夔人畫像祀之

杜宥字叔寬江陰人景泰甲戌進士擢御史以災異直言謫典史遷英德知縣時鄰境多寇宥創立

縣城賊至死守圍不解夜絕士焚其營賊驚潰去  
移韶州通判歸

盛顥字時望無錫人景泰辛未進士天順時以劾  
石亨曹吉祥由御史謫知東鹿縣立九則法以均  
徭役訟者片言折之民謠曰東鹿令錫山盛清如  
水明如鏡郊外有隙地爭來築室居之遂成市號  
清官店累擢都御史巡撫山東境內旱饑顥大修  
荒政民賴以濟

趙敵字叔成武進人景泰甲戌進士授御史因言事謫官尋召還成化初首訟于謙等冤出按江西歲旱奏免逋糧二百六十餘萬貸鹽鈔二載免漕運一年秩滿即擢江西按察使以忤權貴罷

劉本道江陰人由掾吏從靖遠伯王驥征雲南累官戶部侍郎總督糧儲先是漕運京糧陸運四十餘里本道建議令京軍歇操餘月運糧至京而漕運之糧止通州交納歲省羨耗五十餘萬石時同

邑徐晞亦由掾吏起家厯官至兵部尚書以德量稱

徐溥字時用宜興人景泰甲戌廷試第二人授編修厯吏部侍郎弘治初拜文淵閣大學士以目眚乞歸卒謚文靖溥性凝重為首輔承劉吉恣睢之後鎮以安靜務守成法事有不可輒疏爭之時稱名相嘗再廬墓置義田以贍族人所著有謙齋集

王僕字廷貴武進人忠子也景泰辛未賜進士第

三人為南京祭酒修舉教法士風丕變累官吏部  
尚書為人言動不苟以孝友稱憫兄子澄之孤移  
其廬廡之嘗購得楊氏別業其先塋在焉將徙之  
輿不可為闕其垣使祭掃于沂字希曾成化乙未  
進士卒官副都御史事父至孝中裙廁踰身自浣  
滌雖貴顯賓至侍立無倦所得恩蔭以讓其姪

白昂字廷儀武進人天順丁丑進士厯給事中累  
擢兵部侍郎河決武原昂奉勅往治有功進刑部

尚書詔修問刑條例昂列定百餘事內行謹飭痛  
弟蚤世移蔭其子立義學以教宗人卒謚康敏子  
坼由進士厯官右副都御史總督南京倉儲所莅  
皆著政績

吳淵字本深武進人天順丁丑進士厯守福州多  
雪寃獄逋租萬數勸諭有方民不擾而公賦足同  
邑毛珵以舉人厯泉州守有清節

秦夔字廷韶無錫人天順庚辰進士守武昌治行

為湖廣第一累官江西布政所至惠澤及人既去皆立祠祀焉父歿夔年六十餘哀毀感疾卒子銳字國英執喪廬墓建祖祠設祭田

薛為學字志淵武進人成化丙戌進士授監察御史遇事敢言掌法司章疏有能名安撫荆襄流民宣布威德衆賴輯寧既沒民立祠祀之

陸簡字廉伯武進人成化丙戌廷試第三人授編修預修宋元綱目累擢詹事兩典會試號得人卒

於官簡學問該博識度超遠有龍臯集

華山字仁甫無錫人成化乙未進士知許州有貴  
家子犯法當死監司欲曲全之山力爭卒抵於法  
有奸民以地獻鈞州徽王府山執不與入為邵曹  
擢湖廣右參議賑鄖陽饑築房山城政績尤偉  
周膺字克禮武進人成化戊戌進士知萬載縣以  
剛直忤郡守調永春剖決疑獄人服其神遷太僕  
丞卒時無錫張遜由舉人歷涿州守亦以善決疑

獄稱

陳周字文美無錫人成化辛丑進士授戶部主事  
議開引鹽商人賄司徒以請周曰引故欲開不當  
以賄力持不可出為河南參政周王侵民田周判  
還民行部得穴金檄令償汝民逋租民為建却金  
亭時武進蔣容江陰邵經俱以進士先後守潞州  
力繩濬藩之不法為王所奏徵下獄後釋歸

莫驄字日良無錫人成化甲辰進士授工部主事

管濟寧牘旁有月河歲決為患驟改壩建石牘歲省費數萬終兵部郎有頤齋集時同邑繆昌亦以進士官工部主事奉勅勘勢家地還民終四川布政使

張愷字元之無錫人成化甲辰進士知東平州時大璫李興治水張秋所至笞辱長吏以要貨賄獨愷徒手謁之璫知其廉無所問擢守黎平戢軍憲民諸苗感化見黜於逆瑾瑾誅陞福建鹽運使以

疾歸行李蕭然生平未嘗一介取人居家三十年未嘗一入公府盜嘗夜入其室發篋空無所得嗟嘆去

吳儼字克溫宜興人成化丁未進士選庶吉士屢遷侍講學士掌南京翰林院以忤劉瑾被斥瑾誅復官累擢禮部尚書武宗北巡抗疏極諫卒謚文肅從弟仕由進士歷督晉閩粵豫學政校士精審仕孫士貞令上虞有聲厯禮科給事中

王珀字廷瑞武進人成化丁未進士授御史巡南  
城以忤中涓貴戚謫官遷南雄知府善治疑獄郡  
有權場前守率以墨敗珀錙銖無私

華津字濟之無錫人成化丁未進士授松滋令以  
卓異擢刑部主事遇疑獄反覆參鞫盡求生之道  
改戶部嘗監通州倉有怙內監勢請事者峻拒之  
歷廣平知府太僕丞欲收養馬民免地稅錢十之  
五津憫民久困養馬之累遂白巡撫寢其事遷山

西參議卒

胡華字惟峻武進人成化丁未進士授御史搏擊不避權貴屢奉勅巡方皆有能名歷官布政使

徐絃字朝文武進人弘治庚戌進士歷陞廣東按察司僉事分巡嶺東式陳獻章盧建周敦頤書院築堤扞海潮嶺南蠻蜋雜居吏多不檢絃發姦摘伏墨吏望風解綬陞雲南按察副使

秦金字國聲無錫人弘治癸丑進士歷官河南參

政行部至封邱擊敗流寇累擢巡撫湖廣擒斬劇盜討平郴桂及香爐山諸苗嘉靖初為戶部尚書以爭興獻太后上尊號事忤旨罷後起南京戶工二部尚書致仕卒謚端敏著有鳳山集

夏從壽字如山江陰人弘治癸丑進士官戶部郎忤劉瑾落職瑾誅歷福建布政使減市舶踰制罪以清盜源留歲解羨餘以贍軍食擢撫鄖陽乞致仕歸時同邑高貴以進士官浙江副使有剛直稱

陳策字嘉言無錫人弘治癸丑進士守饒州盜據桃源洞單騎入巢諭降之以洞阻深僻奏建萬年縣擢福建參政平汀漳盜遷江西左布政宸濠亂後撫綏凋瘵民賴以寧

貢安甫字克仁江陰人弘治丙辰進士由知縣擢南御史劾壽寧侯張鶴齡怙寵驕恣武宗即位劉瑾擅政輔臣劉健謝遷相繼罷安甫疏爭之瑾怒下獄廷杖斥為民瑾誅起山東僉事尋引疾歸

黃昭字明甫江陰人弘治丙辰進士官職方主事  
拒絕諸璫干請忤劉瑾罷起福建按察副使黃田  
山寇嘯聚間昭往皆散去又以計平亂兵昭在正  
德中與同邑貢安甫史良佐並列黨籍

華皋字文光無錫人弘治丙辰進士官戶科給事  
中未半載疏七上已未會試劾罷考官程敏政調  
南太僕主簿歷遷四川參政鎮守內臣以重賂啖  
皋欲市茶西邊以規利峻却不許事遂寢終福建

布政有雙梧集

湯沐字新之江陰人弘治丙辰進士由知縣擢御史忤劉瑾謫官起廣東僉事釐別鹽政諸弊以楊一清薦擢浙江布政平孝豐寇嘉靖初巡撫四川平松潘寇入為大理卿李福達獄起以奏諫忤旨罷

莊禪字誠之武進人弘治丙辰進士令寶坻外戚中官窟穴為奸禪悉裁以法邑舊無城禪請築之

二旬而畢家寧倪岳疏禪政績十七條行之天下  
擢戶部主事出督徐倉發粟賑荒不待奏報以忤  
劉瑾罷嘉靖初應詔陳江南十事特命所司行之  
史良佐字禹臣江陰人弘治己未進士由行人擢  
南御史正德初與同官共劾劉瑾請留輔臣劉健  
謝遷下詔獄廷杖削籍歸後起雲南副使平十八  
寨叛苗濬治滇池海口溉田千頃滇人德之

劉乾靖江人弘治己未進士官戶部郎以廉明稱

屢出督餉薊州民為立生祠以忤劉瑾再被逮厯  
南光祿卿請移本寺額辦煮醪於北寺詔從之省  
費十倍

葛嵩字鍾甫無錫人弘治己未進士由行人擢給  
事中閱冀州軍儲核貴戚所侵地歸之民武宗初  
詔核在京諸營衛嵩釐剔無所徇積弊盡革又請  
出先朝宮人罷田獵誅奄豎忤劉瑾斥罷

徐問字用中武進人弘治壬戌進士守登州盜賊

屏跡調臨江築堤七十二所以和民累擢巡撫貴州以平獨山土司蒙錢功拜兵部右侍郎歷南戶部尚書乞歸卒謚莊裕問清操絕俗敝廬蕭然田不滿百生平學宗紫陽有讀書劄記山堂萃稿

薛金字子純江陰人弘治壬戌進士官給事中劾劉瑾冒耗內帑謫詹事府主簿後擢廣西僉事平妖人李通保之亂招集岑流諸邑民全活無算有

治齋集

承天秀字鍾之靖江人正德丁卯舉人令錢塘織  
監畢某謀逆天秀勒兵為備奄不敢發事聞奄伏  
誅天秀以功擢南陽同知

丁致祥字原德武進人正德戊辰進士授戶部主  
事藍軍儲理鹽課奸弊一清漕舟自江達淮每多  
阻滯致祥督漕興復儀真舊牘歲省費萬計歷陝  
西副使撫漢中流民威惠並行

周金字子庚武進人正德戊辰進士官給事中都

督馬昂納有姪女弟於後宮金請誅昂而却其女  
嘉靖中歷撫延綏宣府散遣騎卒之圍帥府者累  
擢南京戶部尚書致仕卒謚襄敏

毛憲字式之武進人正德辛未進士擢給事中疏  
斥大臣為奸者數人武宗西幸力請回鑾不報謝  
病歸有古菴文集毘陵人品記

顧可久字與新無錫人正德甲戌進士授行人諫  
武宗南巡下獄廷杖謫國子學正世宗即位擢戶

部郎議禮忤旨復杖闕下歷廣東副使備兵瓊海先是嵩黎出刦及可久至皆望風款附嘗按行諸郡諮詢黎倭出沒之處相其阨塞險阻而為之備禦繪成圖說後人遵用輒效為軍中指南云

蔣同仁字公甫武進人正德甲戌進士官寺正嘉靖初詔按閩獄多平反癸未議大禮伏闕受杖幾斃厯官參議

周振武進人正德丙子舉人初令餘干再任天台

有橋當要道水湍激每造輒圯振禱於神因以石柱砥之橋遂成邑人神之名曰晉陵橋前後為縣八年俸入悉代貧民輸負至入觀不能具道里費兩縣之民立祠祀之餘千堂下有槐久枯振至復茂人以為德政所感云

楊淮字東川無錫人正德丁丑進士授戶部主事監淮通二倉除圃基及額外蓆草費罷中官茶果之供監內庫奄人例有供餽悉絕之歷郎中以公

勤廉慎稱嘉靖初切諫興獻帝祔廟再被廷杖卒後贈太常少卿

惲益字器之武進人正德辛巳進士知安陸州獻陵更制董役中官恣肆御以禮法遷知溫州府人以十善頌之郡人張孚敬當國益同年也惡其剛直不阿調成都

張袞字補之江陰人正德辛巳進士歷國子監祭酒世廟時逮繫議禮諸臣侍郎何孟春員外林惟

聰等抗疏忤旨衆上疏申救奏罷陝西織造止雲  
南採辦撤浙江內監有水南集江陰縣志

華金字子宜無錫人正德辛巳進士歷天津副使  
以抗直忤上官乞致仕歸至戚陸完為太宰金在  
都足不及其門完敗收其母喪於獄并恤其孤同  
年張孚敬貴顯欲援以共事金峻却之

孫鑾字朝望武進人正德辛巳進士授刑部主事  
嘗勘一獄侍郎某授之意鑾不可出諱楚獄冤抑

悉得平反守漢中修堰溉田置衛弁之貪墨者於  
法厯雲南副使邊儲素窘鑾括羨賦捐浮費積至  
萬緡擢太僕卿歸

華察字子潛無錫人嘉靖丙戌進士居部曹與王  
慎中唐順之輩講習詩古文有名累官侍讀學士  
掌南翰林院嘗奉使朝鮮却國王餽典鄉會試稱  
得人居鄉築城繕學減租助役尤多義舉

唐音字希古武進人嘉靖戊子舉人令雞澤清介

自持上官下令有不合輒格不行後卒官幾無以  
殮自部使者以下皆賄之子一麟堅辭不受一麟  
後舉進士官南吏部亦以節行著

唐順之字應德武進人嘉靖己丑會試第一選庶  
吉士調兵部主事改編修忤座主張孚敬以吏部  
主事罷歸久之選官僚起春坊司諫疏請元旦朝  
東宮復削籍時屢有邊警又倭躡江南北以薦起  
厯兵部郎中出視薊鎮邊務條上便宜九事尋視

師浙直敗倭有功加右通政擢撫淮揚上海防善後九事以勞卒官順之學問該洽尤長古文有荆川集又取古今載籍區分部居為左右文武裨五編行世崇禎時追謚襄文

黃正色字士尚無錫人嘉靖己丑進士令南海邑人霍韜座主也其宗人有犯繩以法韜賢之薦擢南京御史劾尚書張瓉坐奪俸護視章聖太后梓宮南葬劾同行巨璫鮑忠等不法反為所構下獄

榜掠謫戍遼東隆慶初起南太僕卿卒祀遼陽三忠祠子學海由進士官贛州守清介有父風

張選字舜舉無錫人嘉靖己丑進士蕭山知縣報最擢給事中諫郭郎代祭太廟干上怒廷杖八十已斃復甦謫為民居職僅三月建言得罪名動海內隆慶初起通政司參議

薛甲字應登江陰人嘉靖己丑進士官兵科給事中時方士邵元節用事輔臣夏言陰與交通甲四

疏指切時事排斥異端因忤言謫官後厯四川兵備僉事

尤魯字懋宗無錫人嘉靖壬辰進士以行人使汴  
藩歸陳藩臣虐民之害累官工科都給事中劾罷  
勲臣倅宦鬻權軍伍者五人請節辛御保聖躬蕃  
皇嗣辨異端擢順天府丞攝尹事奏革占役借馬  
出巨璫故入死罪十人擒大猾於戚畹宦寺之門  
徐材字懋卿江陰人嘉靖丁酉舉人授兗州府推

官州有疑獄久不決材至廉得其實遂具獄論如  
法河決曹縣捍築有功厯遷刑部郎居鄉嘗畫稅  
法以均官民時同邑湯明善亦以舉人倅嚴州理  
寃獄築湖堤遷淮府長史

萬士和字思節宜興人父吉桐廬訓導有學行士  
和嘉靖辛丑進士選庶吉士授禮部主事出為湖  
廣參政撫納叛苗二十八砦累擢副都御史督南  
京糧儲奏行便民六事萬厯初拜禮部尚書以剛

直忤張居正謝病歸卒謚文恭有履菴集

周懿武進人嘉靖辛丑進士廉潔峭直官登州守除猾捕盜人服其神以憂歸卒貧不克葬御史周如斗為助其費

尤瑛字汝白無錫人嘉靖甲辰進士留心韜略手畫九邊圖著論三十篇官儀制司主事力清藩府之賄出為廣東僉事平劇賊四十餘巢遷江西參政卒子鏗亦有詞學選印州判官不赴有集數百

卷

劉光濟字憲謙江陰人嘉靖甲辰進士累官南兵部尚書嘉靖間民苦賦役光濟撫豫時為一條鞭法奏聞通行天下萬曆初在南樞首輔張居正奪情議起或諷其具疏請留堅執不從居正恚嗾御史論罷

金九成字鳴韶武進人嘉靖甲辰進士初令定海銳意興革修築捍海堤人號曰金公塘調章邱治

行悉如定海吏畏民安遷主事卒弟九臯令武康  
有救荒善政

曹三暘字子泰宜興人嘉靖甲辰進士授大理評  
事厯官工部尚書生平精於法律獄詞一經其手  
情法帖然又諳國家典故每遇正務人不能決者  
徐以片言定之子司勲孫應秋並舉進士有文采  
應秋厯官參政

秦梁字子成無錫人嘉靖甲辰進士授南昌推官

除劇盜擢給事中京師築外城被命董役同事宦  
官侵冒工帑劾罷之厯通政司參議忤嚴嵩出督  
浙學諸生鄉試中式九十五人而梁所首拔居五  
十有六屢遷江西布政使

邱緯武進人嘉靖丁未進士授僕官令在任四載  
考績為天下第一擢戶部郎督儲通州移昌平正  
運弁乾沒之罪出守南陽以清勤卒官

汪汝達字志行無錫人嘉靖癸丑進士令黃巖邑

瀕海故無城島倭入寇汝達捐俸倡衆築之三月  
城完及寇再至民恃以固守厯官參議清操絕俗  
致仕歸鬻居以食黃巖士民知其貧醵八十金聞  
於官郵致之適病卒遂以為殮

周子義字以方無錫人嘉靖乙丑進士選庶吉士  
厯南國子監司業南雍諸生素窳惰不振子義教  
飭有方輔臣張居正奪情南都九列俱具疏請留  
子義以正論告祭酒故成均獨無疏居正沒始遷

禮部侍郎改吏部生平究心經世之學熟習國家  
典故及為會典總裁披校尤勤卒謚文恪所集有  
國朝故實二百卷

胡淳字原荆無錫人嘉靖乙丑進士厯知永豐安  
福二縣入觀至不能具橐裝擢御史首論大瑞馮  
保銜之曾慈慶宮災延燒連房淳請放遣先朝後  
宮保摘其疏語以激帝怒斥為民同邑華察知其  
貧以負郭田二頃餉之辭不受自號為民御史放

情山水間以卒

施夢龍字伯雨無錫人隆慶戊辰進士知武定州政聲與前守王鑑埒報最擢戶部員外榷稅淮西商民感悅遷刑部郎恤刑畿內有明允之稱歷江西副使

吳中行字子道武進人尚寶丞性子隆慶辛未進士選庶吉士授編修首上疏劾張居正奪情事廷杖削籍直聲震天下居正死起故官歷陞掌南翰

林院風節尤著子亮奕元俱舉進士亮官御史亦以剛直聞終大理少卿奕令龍溪元官湖廣布政皆有聲績季子襄由舉人歷滄州知州以忤巨璫罷

范鳴謙字貞夫江陰人隆慶辛未進士令龍溪擢御史出按真定諸郡郡多貴戚一裁以法浙中兵民相繼告變勅往巡視僇其渠魁反側以安

唐鶴徵字元卿順之子隆慶辛未進士授禮部主

事歷南太常少卿計殲妖人劉天緒劾璫殿屬丞  
正其罪以病免與顧憲成等講學東林以博洽聞  
年踰八十手不釋卷

施策字懋揚無錫人隆慶辛未進士授禮部主事  
改南吏部攝考功郎掌計典既核且嚴尋奉使高  
麗力却餽遺清操上聞擢南太僕卿駐滁陽三年  
清馬政蘇驛因滁人德之孫元徵由進士歷湖廣  
福建僉事有平巨寇功玄孫熙舉人有文行

秦燿字道明無錫人隆慶辛未進士官給事中多所建白累擢僉都御史出撫南贛平岑岡劇賊擒南雄妖僧自贛移楚歲旱饑疫疏請糴穀行賑全活及收瘞無算有荒政摘要

孫繼臯字以德無錫人萬曆甲戌廷試第一歷官吏部侍郎嘗疏救御史曹學程于獄及諸言官之被謫者佐銓時屢陳選途壅滯之弊以諫孝安太后山陵事忤旨罷歸繼臯清不近名峻不絕俗獨

能持大體

嚴一鵬字化卿無錫人萬曆丁丑進士以母老不謁選七年始授行人擢御史劾厥監張鯨置之法又劾湖廣稅監陳奉出按山東疏請罷礦稅不報條列稅監陳增贓私二百萬增以憂死巡方三年乃得代歷刑部左侍郎卒

萬象春字仁甫無錫人萬曆丁丑進士選庶吉士改給事中議復建文年號加景帝廟謚酌議藩祿

裁內侍止內操前後七十餘疏多見施行歷巡撫  
山東時倭寇朝鮮登青萊三郡戒嚴象春選兵儲  
餉東郡恃以無恐疏論礦稅之害忤礦瑞引疾歸  
吳達可字安節宜興人萬曆丁丑進士由知縣擢  
御史視鹽長蘆值歲祲繪饑民十四圖上之請賑  
貸按江西劾稅璫潘相罪還掌河南道佐總憲溫  
純京察時沈一貫當國達可挺立不阿正人賴之  
累遷通政使告歸卒子正志由進士官刑曹劾言

官之排擊正人者謫宜君典史直聲震一時後歷江西僉事

李應祥字善徵無錫人萬曆丁丑進士知臨海縣海倉險遠委輸者苦之應祥請改折又出帑金市馬以紓牧馬之困參議陝西調護礦事官私咸便尋調督學卒

侯先春字元甫無錫人萬曆庚辰進士官給事中條列轉漕救荒十五策播州獻俘疏請年十六以

下者皆免死閱視遼陽劾罷大帥之不職者稅監  
高淮糾斥鎮將先春力爭非制帝怒謫官卒後贈  
太常少卿孫鼎鉉進士官戶部主事

袁一驥字季友江陰人萬曆癸未進士官禮部郎  
請復建文年號即得旨改正累擢閩撫力裁稅璫  
高寒之橫并疏劾其不法即撤回京閩人歡呼尋  
乞歸閩人思其德立專祠祀之

徐常吉字士彰武進人萬曆癸未進士授中書舍

人擢南戶科給事中戶科故攝後湖黃冊所入不貲常吉皭然不染督學房寰貪墨不法劾斥之外轉浙江僉事未任卒

史孟麟字際明宜興人萬曆癸未進士選庶吉士改給事中冢宰孫鑑考功郎趙南星掌京察孟麟實左右之南星斥亦引疾歸砥礪名節預東林講會起太僕少卿挺擊事起疏請立皇太孫以絕覬覦被謫歸後起南禮部主事至太僕卿

沈應奎字伯和武進人萬曆乙酉舉人守裕州有  
惠政冢宰孫丕揚過裕不往迎謁孫突入其署見  
方烙餅炙韭因與共食入朝薦其廉擢主事出知  
汀州稅監高棅恣橫憚應奎不敢入其境歷南光  
祿少卿坐黨事削籍

顧允成字季時憲成弟萬曆丙戌進士時新用鄭  
貴妃允成對策極言內寵羣小之害執政駁且恚  
置末第會御史房寰劾南都御史海瑞允成奏寰

欺妄詔以出位言事奪冠帶還家久之由教授歷  
禮部主事三王並封抗疏爭之未幾以劾輔臣謫  
官乞假歸從兄講學東林先後居官僅六十日後  
贈光祿少卿有季時大辨小辨偶存二書

安希范字小范無錫人萬曆丙戌進士歷南吏部  
主事時政府多斥異已希范上言輔臣誤國不忠  
正人如趙用賢趙南星孫鑛等先後被斥忠言如  
高攀龍反蒙重譴乞嚴諭閣臣無挾私植黨疏入

削籍歸與高顧諸賢講學東林天啟初贈光祿少  
卿

王就學字所敬武進人萬曆丙戌進士授戶部驗  
糧廳主事中官需索橫恣解戶有累死不得掣批  
者就學稱引祖制章兩上卒得請著為令改禮部  
進員外又調吏部以諫仁聖太后梓宮將發有遣  
官代送之詔具疏力諫忤旨削籍

龔道立字應昇武進人萬曆丙戌進士初授兵曹

有儒帥畏寇求內徙廢帥落職求起用挾重賂以進皆拒而罷斥之出知建寧弭亂卒拊窮黎及入觀鬻家產以資行李歷湖廣按察使乞休歸

薛敷教字以身武進人應旂孫萬厯己丑進士以直言忤閣臣勒回籍起厯國學助教爭三王並封事因申救考功郎趙南星謫光州學正乞養歸垢衣糲食一介不取家居二十年力持清議鄉人不敢為非與顧憲成兄弟講學東林卒贈尚寶司丞

周繼昌字文白無錫人萬曆己丑進士由禮部郎  
出為湖廣僉事值王師征播召募齋送經畫得宜  
改命督學以艱去起補山西晉藩素慢士每禁士  
府第又有巡按欲以私隙殺士繼昌皆力爭得免  
遷浙江溫處道討平礦賊擢順天府丞未任卒

葉茂才字參之無錫人萬曆己丑進士官南工部  
主事榷稅蕪關課滿輒縱商船不復取稅累擢南  
太僕卿以建言引歸天啓中擢南工部侍郎致仕

凡通籍四十年十九在告與高顧講學東林清介絕俗布衣蔬食終其身

陳幼學字志行無錫人萬曆己丑進士知確山中牟二縣有異政擢刑部主事恤刑畿內多所平反出守湖州收大猾三人杖殺之豪強屏息諮詢民情無微不達御史錄其治行三十六事上之於朝歷江西副使歸起太常少卿卒著有禮樂考諸書張納陛字以登宜興人萬曆己丑進士由刑部主

事調禮部時有三王並封之議納陞與同官顧允成等力爭之事得寢趙南星掌內計以執法忤輔臣被斥復疏救甚力謫鄧州判尋乞歸預東林講席闡發精切顧憲成深推重之

儲昌祚字立寵宜興人萬曆壬辰進士令鄱陽浦城二縣有政績兩邑俱建祠祀之歷四川兵備副使致仕歸居鄉以厚德稱歿後數年邑有民變焚毀巨室廬墓獨相戒勿犯儲氏

顧言字尚實江陰人萬曆壬辰進士令慈谿捐俸遷縣治民不知役抑礦璫定軍變開杜白二湖以興民利歷四川參政卒時靖江孫同倫由舉人令德化築封廊桑樂二洲石堤百餘里更置石牧以洩澑水民賴之歷官雲南參政

湯兆京字伯閔宜興人萬曆壬辰進士令豐城擒劇盜報最擢御史劾官閭之橫論礦稅之害掌河南道主察典斥去湯賓尹等數人力請福王之國

論家宰趙煥擅權遂奪俸以不得其職告歸居官清正負時望清議倚以為重卒贈大僕卿

孫慎行字聞斯武進人萬曆乙未廷對第三人授編修累官禮部侍郎署部事合文武諸臣伏闕力請福王之國尋告歸熹宗立召拜禮部尚書論紅丸一案斥輔臣方從哲之罪秦藩由旁支進封賄近倖封四子郡王力爭不得即引疾歸魏忠賢擅權修三朝要典奪慎行官遣戍寧夏懷宗初起故

官召入未及奏對卒謚文介慎行學行醇潔為一時縉紳冠

陳于廷字孟諤宜興人萬曆乙未進士由知縣擢御史劾閣臣朱賡當斤視麟河東劾稅使張忠撓鹽政按江西糾湖口稅閭潘相罪天啓中累擢吏部侍郎攝尚書事以會推家宰忤魏忠賢斥為民懷宗初起南京右都御史主察典盡斤諸不肖者召拜左都御史加太子少保復以奏事伉直削籍

歸于廷負清望端亮有守同邑周延儒當國一無所附麗

顧應暘字太初無錫人萬曆丁酉舉人由南刑部郎出守思恩地險多盜應暘募人鑿山闢路且計道里設戍守由是行旅無虞又以誠信撫土猺境內以寧遷蒼梧道引疾歸

劉元珍字伯先無錫人萬曆乙未進士授南禮部主事進兵部郎中會京察論劾執政沈一貫比暖

僉人罔上不忠謫極邊後起光祿少卿卒於官罷歸與錢一本為同善會行義重於時

何士晉字武毅宜興人萬曆戊戌進士由推官擢給事中遇事敢言論張差挺擊事疏三上鄭國泰出揭辨再劾之出為浙江僉事天啓初巡撫廣西敗安南有功擢總督兩廣魏忠賢用事以爭挺擊

削籍歸

李守俊字念劬宜興人萬曆辛丑進士歷戶部主

事權九江未及期課滿即放闢免稅商人建祠祀之擢廣西布政時海內藩司皆為魏璫建生祠恥之不赴坐黨高攀龍削籍聽勘崇禎時復起湖廣布政卒於官同邑路進以進士守湖州歲饑盜起責成太湖漁舟巨盜咸就縛歷官布政使

龔三益字仲友武進人萬曆辛丑進士選庶吉士累遷侍講奉詔使楚藩王年少而驕閹人導從掖門入三益峻責之王慙闢中門見乙卯典試北闈

為忌者所中左遷湖廣參政引疾歸子九疇亦成進士有文名

吳宗達字上于武進人萬曆甲辰廷對第三人授編修歷東閣大學士時政尚操切宗達劑量於寬嚴之間裨益殊多有言官得罪特旨立決宗達揭救得免又疏爭分遣中官監邊鎮軍卒謚文端

周炳謨字仲觀子義子萬曆甲辰進士選庶吉士歷禮部侍郎纂修光宗實錄載三案事直筆無所

阿忤魏璫有武闈所取士許顯純請介紹於璫厲聲拒之即日告歸其黨因劾所纂實錄非實削職炳謨已前卒矣後追謚文簡

華元提字爾遐無錫人萬曆甲辰進士授新鄭知縣調商邱給牛置屯募力助墾稽其積散而賞罰之商俗好為掾史以避役元提第墾田多者用之以治最擢御史

鮑際明字伯參無錫人萬曆甲辰進士授海康令

地震城圮而欽州以變告際明為慰撫部署民以無恐調同安獎拔寒士再調寧都清郵傳察姦胥時推為百城表

錢春字若木武進人一本子萬曆甲辰進士由知縣擢御史按湖廣劾守備中官又抗疏論首輔方從哲出為福建參議後遷光祿卿偕九卿疏糾魏忠賢削籍歸後起通政司累擢戶部尚書督倉儲儻運除漕船壓白糧之弊白糧先漕行自春始尋

改南戶部以申救黃道周罷歸

陸大受字凝遠武進人萬曆丁未進士歷戶部郎中疏請減福王莊田劾鄭國泰驕恣亂法又力爭挺擊事出守撫州以清節聞大受身非言官遇事敢言坐京察罷後薦起未用卒

華敦復字雍明無錫人萬曆丁未進士由戶部郎出知嚴州歷遷四川布政使時有議加蜀糧六十萬者以去就力爭得寢預平奢僉敘功受賞

許鼎臣字爾鉉武進人萬曆丁未進士歷光祿丞  
以忤魏瑞歸後起本寺少卿寧武兵叛擢撫山西  
請蠲租卹貧增餉募士兵民感賴寧武遂平在晉  
甫十月前後八十餘疏墨吏敗將悉正其罪旋奉  
命協勦河南流寇為監璫論罷

陸完學字汝成武進人父南陽以貢授善化令有  
清名完學舉萬曆丁未進士官浙江僉事歲饑或  
議減米價完學謂杭不產米減價則商裹足矣越

數日商舟四集價果平擢撫浙江海潮壞堤漂沒  
萬計完學修築海塘始免沖潰之患累官兵部尚  
書

董應揚字于廷武進人萬歷己酉舉人累官兵部  
員外以廉能著時京僚有進馬之額應揚貧質束  
帶及郎舍用物以應里中以孫慎行張瑋與應揚  
為三清

莊起元字中孺武進人萬歷庚戌進士歷戶部郎

督餉天津籌畫海運省公帑鉅萬大璫崔文昇等  
督漕監司皆執屬官禮起元獨與抗衡終太僕少  
卿弟廷臣同年進士厯鄖陽守罷建魏璫生祠以  
氣節著累遷湖廣布政

范世正字獻吉靖江人由庚戌副榜令羅田邑介  
麻黃間豪紳大猾持吏短長又民素刁悍世正為  
治嚴明一無縱舍始各斂戢清汰里役令行禁止

遷廣平郡丞

繆昌期字當時江陰人萬曆癸丑進士選庶吉士  
挺擊事起力言主風癲之非授檢討即移疾歸天  
啓初起遷左贊善進諭德楊漣劾魏忠賢有言昌  
期代草疏者忠賢大恚恨遂落職繼入織監李實  
疏中逮繫追贓拷掠斃於獄後贈詹事謚文貞

毛士龍字伯高宜興人萬曆癸丑進士由推官擢  
給事中楊漣以謹去抗疏請留內侍劉朝以盜貲  
下獄論死夤緣魏忠賢得釋士龍嚴劾之諸奄恨

刺骨又數忤魏瑞再削籍謫戍平陽尋逮治潛匿以免崇禎初起用歷僉都御史

周鼎字在調宜興人萬曆癸丑進士授平陽推官歷總河侍郎加工部尚書明末河決長山泇河塞決策開之三月告成次塞決口築遙樓二堤邳州三面距河屢被河患請改河羊山外州遂以安

李應昇字仲達江陰人萬曆丙辰進士授南康推官出寃民十九人於死撤湖口關稅復白鹿洞書

院擢御史抗疏糾魏廣微魏忠賢又代都御史高攀龍草疏劾崔呈秀閻黨曹欽程勑應昇遂削籍繼竄入李實疏逮繫追贓下獄尋斃之崇禎初贈太僕卿謚忠毅子遜之字敏公隱居不仕著述甚富

蔣允儀字聞韶宜興人萬曆丙辰進士天啓初由知縣擢御史劾張鶴鳴方從哲及王紹徽時魏忠賢擅權因冬至上扶陽抑陰疏中旨切責奪俸出

按陝西適王紹徽秉憲令嗾其門人劾罷之崇禎即位起掌河南道主京察貶斥甚多仕路一清歷撫鄖陽

儲顯祚字文曙宜興人萬曆丙辰進士官戶部郎監內官儲閭聚而譁撻其首一人天啓初出理延寧糧儲延鎮缺餉萬數顯祚便宜調劑軍心以安遷襄陽知府有貴戚恣橫悉裁以法不少貸值魏忠賢用事前所撻其黨也即乞歸後復起厯湖南

按察使

張瑋字席之武進人萬曆己未進士由戶曹調職  
方郎中為廣東提學撫臣為魏瑞建祠欲瑋撰上  
梁文自投劾歸崇禎初起備兵嶺北山寇蹂躪郡  
邑瑋身冒矢石搜斬無算又傳檄諭賊降之歷遷  
左副都御史時總憲劉宗周僉都御史金光辰與  
瑋同視事臺中肅然京師目為三清卒謚清惠  
張有譽字誰譽江陰人萬曆己未進士授南戶部

主事樞邢闢五尺以下舟悉免其稅歷江西糧道  
天津有警以兵法部勒漕艘五千餘退入海口事  
定抵通擢四川按察使兼攝藩篆癸未大計舉清  
廉第一累官南戶部倉場侍郎

周詩雅字廷吹武進人萬曆己未進士令寶坻革  
馬戶侵占魏璫黨莊客二人倡白蓮教畿輔騷動  
以計除之左遷上林簿歷貴州提學僉事  
白貽清字希賢武進人萬曆己未進士授戶部主

事備兵榆林有水泉三條溝張義堡諸捷歷戶部  
侍郎督餉宣大進尚書總督倉場簡任司屬攬持  
紀綱得大臣體

貢修齡字國祺江陰人萬曆己未進士令東陽以  
治行卓異擢刑曹引經斷獄時稱明允出為浙江  
參議督漕運盡削陋規厯江西參政

盧象昇字建斗宜興人天啓壬戌進士知大名府  
擒劇盜馬翩翩遷大名兵備扼守要害屢破流寇

尋撫鄖陽勦湖南北諸賊殆盡遂總理七省軍務  
大破李自成於汝又擊破諸賊於潁浮斬無算改  
總督宣大大興屯政積穀二十萬會丁外艱候代  
畿輔告警特命起復督師入援與本兵楊嗣昌忤  
孤軍次鉅鹿縣南十里賈莊力戰死象昇三賜尚  
方劍未嘗戮一偏裨愛才恤下畿民聞其死皆雨  
泣贈太子少師兵部尚書謚忠烈又與弟象觀再

見忠節傳

秦炯字儼海無錫人天啓壬戌進士由知州入為  
戶部郎管東宮廳節費辭羨以清廉稱巨瑞張彝  
憲督理戶工二部屬視諸曹炯不為屈忤璫告歸  
周士登字伯昇武進人天啓乙丑進士歷川東道  
闖賊犯夔州掠夔餉數十萬朝議嚴詰百姓聞之  
爭先樂輸旬日間充舊額仍命監軍四省率兵追  
寇擒賊首一字王普天飛等

劉憲章字端甫武進人崇禎丁丑進士官御史巡

城行保甲法貴戚奸民屏息不敢橫疏救劉宗周  
張璋金光辰尤著直聲同邑劉呈瑞以進士官御  
史按京畿不避權貴畿輔告警力守通州諸城多  
潰惟通獨全

趙繼鼎字止安武進人崇禎庚辰進士授公安令  
時新徙縣治經畫撫綏甚有條理勢豪猾吏懲治  
不少貸惠藩承奉旗校抵驛取民夫擾甚繼鼎身  
為衆夫先詣承奉不敢繹騷而去陞兵部主事以

父喪歸家居授徒以終其身子申喬申季

高世泰字彙旃攀龍從子懷宗時以進士授禮部  
主事厯湖廣提學僉事嚴立教條以理學訓士葺  
江夏濂溪書院遴楚士講習其間任滿乞歸與諸  
同志勤舉講會

國朝莊應會字春候武進人明季以進士司儀曹督學  
八閩順治初補江西參政值金聲垣亂以軍功遷  
右布政入觀疏請汰袁瑞三府浮糧厯陞刑部右

侍郎卒弟應詔以恩貢令興寧山賊竊發有守禦  
功金聲垣叛時將軍譚泰知其才疏授瑞州推官未  
幾致政歸同邑馮達道字惇五順治丁亥進士授  
戶部主事應會請汰浮糧疏下同官咸難之達道  
力爭得報可

呂宮字長音武進人順治丁亥進士廷對第一授  
祕書院修撰累官弘文院大學士在侍從時請建  
常平倉為吏侍肅清銓政薦江東者舊密勿襄贊

持身謹飭請停江浙白糧以甦民困

楊兆魯字泗生武進人順治丁亥進士授刑曹郎  
條奏五事皆中時宜提學江西請留餘額生一千  
八百餘人陞按察建南歸

徐可先字聲服武進人順治丁亥進士除東鹿令  
有平盜功改任龍泉造石梁五百餘丈以濟行旅  
禁溺女崇學校民俗一變陞刑部主事歷山東提  
學告歸

蔣永修字紀友宜興人順治丁亥進士知應山縣  
勞來有恩鄰境賊起練民兵守禦賊不敢逼舉卓  
異擢刑科給事中出知貴州平越府清丈苗民虛  
稅八千有奇擢湖廣提學副使振興文教楚風為  
之一變子景祁工文章

周啓嵩字立五宜興人順治丁亥進士授庶吉士  
累遷右庶子歷鴻臚少卿歸杜門不干謁邑有大  
利弊則身任之止宜邑添兵駐防之議陳版荒逋

糧均派之失皆有造於桑梓

劉幨字江舟靖江人順治丁亥進士知建安縣建  
為山賊窟穴大兵進剿饋餉調運籌畫得宜事平  
招流亡貸瘠從建民德之

薛信辰字侯執無錫人順治己丑進士授潮州知  
府發守將郝尚久姦謀未幾尚久叛縛信辰將害  
之百姓環泣請命乃繫獄家屬投井死者五人大  
兵平潮信辰始得釋尋備兵并陞時議圈地授旗

人信辰調劑兵民咸感悅歷陞浙江布政使

顧煜字銘柏無錫人順治己丑進士宰象山仁儉  
自勵練兵却寇履畝平徭設觀瀾社集諸生講課  
號大治以失上官意罷歸

儲曾字觀我宜興人順治己丑進士知永豐縣豐  
多盜曾擒其渠魁誅之餘悉解散兵有奪民財者  
寘諸獄其黨持提標偽檄計挾以遁曾并繫之自  
是驕兵斂迹脫明忠臣魏冕後裔戍伍籍以征糧

不及額免歸越一年奉檄仍詣豐民爭先輸納逋  
額竟清子振康熙丁未進士右春坊右庶子居官  
恪慎榆康熙壬戌進士授臨川知縣亦廉靜有守  
周季琬字文夏鼎子與兄仲球同登順治壬辰進  
士由庶吉士改御史疏陳江南漕政之敝康熙初  
請躬承七鬯疏入留中明春季琬卒前疏忽奉

聖祖俞旨予馳驛歸葬

岳鍾淑字天濤武進人順治壬辰進士令錢塘改

閩縣皆有惠政擢吏部主事陞員外郎無私謁退食焚香讀書而已

路遴字子將宜興人順治壬辰進士官刑部郎多所平反條議革九鎖柙牀遷永平守築石堤數百丈以捍灤河水災鋤強暴護善良在郡三年治行稱最

秦鉞字克繩無錫人順治乙未會試第一廷對第三人授編修出為廣東參議備兵杭嚴有告無為

邪教者其教戒飲酒食肉鉢即於堂下各食以酒  
肉散遣之按察江西有叛人久未獲所司得姓名  
相似者鍛鍊誣服鉢訊釋之賊亦旋獲後遷湖廣  
糧儲道告歸

徐元珙字輯五武進人順治乙未進士為刑曹郎  
出分巡建寧弭山藪窟穴之姦移守口北撫定邊  
民之避調發者陞太常卿議兩郊配位及釐正北  
海祀所皆傳經義厯遷左副都御史子永寧字坤

載康熙辛酉舉人任大理寺評事能於其職居鄉  
稱長者

許之漸字青嶼武進人順治乙未進士任戶部主  
事考授監察御史稱敢言救科臣楊雍建參革義  
王孫可望懲莊頭劉七皆著風采旋巡視陝西茶  
馬歸

張偉字漢公順治丁酉武舉康熙甲寅滇黔叛條  
陳十事於軍門督撫薦授靖遠監督同知擢知延

安府十三載綏輯兵民陞副使道卒於官

華亦祥字纘長無錫人順治己亥進士第二人授編修遷侍讀居家孝友周宗黨之急同邑有繫逮入都者多委頓道路亦祥為護卹之各得保全

楊大鯢字陶雲武進人廷鑑子順治己亥進士授庶吉士為姻戚所累謫新建丞大臣薦邊才擢九江同知有軍功歷陞貴西分巡道入覲請裁併黔西諸府隨擢按察山東卒於官

岳宏譽字聲國順治辛丑進士任山西靈邱令丁  
艱起補獲鹿邑多桀猾莊頭星布宏譽一以法繩  
之舉卓異授兵部主事轉刑部郎陞湖廣提學僉  
事有公明稱

湯自超字軼人武進人以歲貢令桂東修城建倉  
積荒之後賑卹災黎全活甚衆內陞中書告歸

許毓芳字尹吉康熙壬子副榜令任邱巡撫李光  
地薦其政績擢知邠州改北通州築隄百二十里

以捍水患覈旗莊之占民產者居鄉好行其德三  
黨待以舉火者常數十家而自奉清約如寒士  
任弘嘉字葵尊宜興人父繩隗順治丁酉舉人有  
逸才弘嘉康熙丙辰進士授行人擢御史至左通  
政遇事敢言請升程朱配享廣鄉舉額裁冗員禁  
夤夜之勾較編丈之批駁皆有益風教

周清原字雅楫武進人舉博學宏辭授翰林院檢  
討歷官副都御史疏請革鋪舍飭刑具又請直省

俱立育嬰堂收養棄孩俱得

旨允行

聖祖嘗稱為孝子

御書孝經賜之遷工部右侍郎卒

蔡鵬江陰人年十五補邑諸生父與邑豪劉某相  
讐令袒豪置鵬父於理鵬走京師直父寃以是知  
名參安親王幕從征吳三桂有功授長沙令三桂  
以偽劄招之鵬告王馘其使招集流民給牛種墾

荒蕪民有起色以上官不悅罷歸

陶自悅字心兑武進人康熙戊辰進士知猗氏縣減耗羨歲二千餘兩陞澤州知州捕鹽梟李某寘之法却商人規例減鹽價什之四奉

京力陳衰狀歸里研精宋五子書教人坐立飲食皆有法則

朱廷鎔字玉汝江陰人康熙戊辰進士授淳化令會歲歉民饑廷鎔覈實詳報上官遲之乃按戶給

帑一兩隨以擅給自効不問擢御史歷大理寺少  
卿告歸

趙申季字行瞻康熙丁丑進士任遷江令邑素多  
科派申季一切革之輯獵蠻劫掠者禁豪強放穀  
漁民舉卓異改授翰林院編修督學山東廉慎自  
矢評騭試卷不假手幕客以勞卒官

陳聶恒字曾起武進人康熙庚辰進士授荔浦令  
邑多獐羆姦民挾以煽亂聶恒單騎抵其巢諸酋

羅拜因諭以禍福令返荔民之居獐穴者又補長寧興學造士文風一變治最授刑部主事改翰林院檢討未幾卒

陳大經字筠操無錫人由監生授寧津令門無閭人投訟牒者入燕寢訴其情被訟者亦然曲直立剖催科不用鞭撻亦無逋者農時民告貸於官則應之秋償不責息病者為診脈予之藥鮮不效嘗有大役鄰邑部送役夫千人至縣期尚緩餕糧將

盡大經盡散遣還與約某日至衆感之及期畢集  
章耿光字子觀江陰人康熙丙午舉人居鄉以孝  
友聞任徽州府學教授割俸修葺學宮以為諸士  
倡嘗請於上官設天都書院及義學四所以教士  
子山賊竊發文武官有倉皇引避者耿光獨曰吾  
雖無城守責亦

朝廷官也當効死於此間者壯氣

江南通志卷一百四十二